



Des quatre Euangelistes receus par l'Eglise.

PLUSIEURS ont escrit l'histoire Euangelique de nostre Seigneur Iesus-Christ, comme tesmoigne S. Luc. Mais l'Eglise, qui est fondée sur la pierre par la voix de nostre Seigneur, n'en a approuvé & accepté que quatre. Le premier de tous est S. Matthieu, Publicain, surnommé Leui, lequel escriuit l'Euangile en langage Hebreu en la Iudée, principalement pour les Iuifs, qui auoient creu en Iesus-Christ. Le 2. est S. Marc, premier Euesque de l'Eglise d'Alexandrie & Disciple de l'Apostre S. Pierre, lequel a écrit l'Euangile conformément à ce qu'il auoit appris des predications de son maistre. Le 3. est S. Luc Medecin, Disciple de l'Apostre S. Paul, lequel escriuit l'Euangile es parties d'Achaye, & Bithynie, sur ce qu'il en auoit ouï des Apostres. Le dernier est S. Iean Apostre & Euangeliste, que nostre Seigneur Iesus-Christ ayma grandement, lequel à la priere & instante requeste de presque tous les Euesques d'Asie qui estoient lors, & de plusieurs Egli-fes, escriuit le plus hautement de la Diuinité de nostre Sauueur. Ces quatre Euangelistes auoient esté long-temps auparauant prédits par le Prophete Ezechiel, quand il vid la semblance de quatre animaux : Le premier ayant la face d'un Homme, le 2. la face d'un Lion, le 3. la face d'un Veau, & le 4. la face d'un Aigle. La premiere face signifie S. Matthieu, la 2. S. Marc, la 3. S. Luc, & la 4. S. Iean. Aussi S. Iean en son Apocalypse en parle, quand apres l'exposition des vingt-quatre Anciens, qui tenans leurs harpes & phioles adoroient l'Agneau de Dieu, il introduit des foudres, & des tonneres, & sept esprits courans çà & là, & vne mer de verre, avec quatre animaux pleins d'yeux, dont l'un ressembloit vn Homme, l'autre vn Lion, le troisiéme vn Veau, & le quatriéme vn Aigle volant. Et par là il est euident qu'on ne doit receuoir que les quatre Euangiles des dessusdits, & rejeter tous les autres.

Sainct Hierosme en la preface sur saint Matthieu.